

Nous quittons donc les Eaux qui vont jusqu'a Quebeq a 4 ou 500 Lieuës d'icy pour prendre Celles qui nous Conduiront desormais dans des terres estrangeres. auant que de nous y embarquer, nous Commençâmes tous ensemble une nouuelle deuotion a la *ste*. Vierge Immaculée que nous pratiquâmes tous les jours, luy addressant des prieres particuliers pour mettre sous sa protection, et nos personnes et le succez de nostre voyâge, et apres nous estre encouragés les vns les autres nous montons en Canot.

La Riuiere sur laquelle nous nous embarquâmes s'appelle Meskousing, elle est fort large, son fond est du sable, qui fait diuerses battures lesquelles rendent cette nauigation tres difficile, elle est pleine d'Isles Couuertes de Vignes; sur les bords parroissent de bonnes terres, entremeslées de bois de prairies et de Costeaux, on y voit des chesnes, des Noiers, des bois blancs, et une autre espece d'arbres dontz les branches sont armées de longues espines. Nous n'auons veu ny gibier, ny poisson, mais bien des cheurëilz et des vaches en assez grande quantité, nostre Route estoit au suroüest et apres auoir nauigé enuiron 30 lieuës, nous apperceûmes un endroit qui auoit toutes les apparences de mine de fer, et de fait vn de nous qui en a veu autrefois, assure que Celle que Nous auons trouuée est fort bonne et tres abondante, elle est Couuerte de trois pieds de bonne terre, assez proche d'une chaine de rocher, dont le bas est plein de fort beau bois, apres 40 lieuës sur Cette mesme route, nous arriuons a l'embouchure de nostre Riuiere et nous trouuant a 42 degrez et demy D'esleuation, Nous entrons heureusement dans Missisipi Le 17^e. Juin avec vne Joÿe que je ne peux pas Expliquer.